

STOP !**Demhat Dêrikî**

SIYASETA DEWLETA TIRK ÎFLAS KIRIYE

Dema kesek bi nexweşiyek bêçare dikeve û pêlên mirinê di hundir de zora pêlên jiyane dibe bêguman yê li dawîya sekerata “mirin” be! Siyaseta dewleta tirk beramber pirsgirêka gelê kurd vê dîmenê ji hemû aliyan ve dide diyarkirin. Kemalîzm di qonaxên duh, îro û sibe de. Di kesayetîya artêşa tirk û Erdogan de ku çareserkirina rasteqîne ya pirsgirêka gelê kurd mirina xwe dibînin, bûne zelamê “nexweş”! berpîrsên textê Enqere îflas kirine û nema zanin çî bikin. Tenê şer! Tenê girtin û kuştin! Tenê komkujî û hemû şeweyên siyaseta kirêt ji bo xwe rewa dibînin. Anku, li hember guhortin û deskeftinên li herêma Kurdistanê û biryara tevgera milletê kurd borîyên heneseyên wan hatine girtin. Ji ber vê çendê, ji bo ku astengiyan li dijî deskeftinên gelê kurd derxin, gefan li DAY, yê û Ewropa dikin. Caran dibêjin em dê el-Qaîda nas bikin û piştgiriya wê bikin. Caran dibêjin em dê partiyeke Îslamî ava bikin; ji bo kurdan û caran jî dibêjin em dê behsa “komkujîya” hindiyên sor nas bikin. Dewleta tirk dixwaze hemû cihan şerê kurdan bike da ku mebestên xwe yê kirêt pêk bîne.

Lê, li gorî dîtina min li van demên dawî de, pîr zelal hate dîtîn, ka çawa dewleta tirk di warê dîplomasiyê, siyasî û leşkerî de îflas kiriye. Ev demeke bi hêceta şerê li dijî PKK-ê ku piştgiriya ji Emerîka wergirtibû; ev piştgirî, piştgiriya dawîne ku yê çî rê ji bilî çareserkirina piştgirêka kurd di warê siyasî de nemîne, çiya û gundên herêma Kurdistanê bombebaran dike. Di van êrîşan de kesên welatî hatin kuştin, gundên wan xirabûn, bi sedan giyanewerên wan kuştin, di bin mercên dijwar de pîr malbat ji war û gundên xwe koç kirin. Ji aliyekê din ve serokê artêşa tirk van êrîşên hovane wek serkeftin li dijî PKK-ê dibîne. Gelo, kuştina welatiyan serkeftine yan îflasbûna siyaseta ye? Lê, gelê kurd baş dizane ku hemû hewldanên dewleta tirk, êrîş û gefên wan armanca xwe ew e ku aramiya li herêma Kurdistanê aloz bikin û dîwarên astengiyan li pêşîya pêşketinên li Kurdistanê bilind bikin. Lê, diyare ku wan ji bîr kiriye ku duh ne îro ye, îro dê ne sibe be. Helwest û biryara serokê herêma Kurdistanê û tevgera gelê kurd vê yekê bi wan dide diyarkirin.